

# দেশের ওটিটিতে এলো নতুন কনটেন্ট

প্রতি সপ্তাহে ওটিটিতে যুক্ত হচ্ছে নতুন নতুন কনটেন্ট। অক্টোবর মাসে মুক্তি পাওয়া ওটিটি কনটেন্টসহ চলতি মাসে মুক্তি পাওয়া ও মুক্তির অপেক্ষায় থাকা নতুন ওয়েব সিরিজ, সিনেমা, প্রামাণ্যচিত্র ও রিয়েলিটি শো'য়ের খবর জানাচ্ছেন সীমান্ত।



## আধুনিক বাংলা হোটেল - চরকি

মোশাররফ করিম এবার নতুন এক ওয়েব সিরিজ নিয়ে হাজির হয়েছেন। ৩১ অক্টোবর ওটিটি প্ল্যাটফর্ম চরকিতে মুক্তি পেয়েছে হরর ফ্যান্টাসি সিরিজ 'আধুনিক বাংলা হোটেল'। বাংলা খাবারকে উপজীব্য করে লোকাল মিথলজি, ফ্যান্টাসি, সাইকোলজিক্যাল হররের সংমিশ্রণে একটি গল্প বলা হয়। যার প্রতিটি গল্পে একটা করে লোকাল বাংলা খাবার পরিবেশিত হয়। প্রত্যেক এপিসোডে নতুন খাবার নতুন টেস্ট। প্রতিটি গল্প শেষ হবে এক অপার্থিব ফ্যান্টাসি কিংবা বিশ্বাস ও অবিশ্বাসের দ্বন্দ্বে। ৩ পর্বের সিরিজটিতে বিভিন্ন গুরুত্বপূর্ণ চরিত্রে অভিনয় করেন গাজী রোকায়ত, সালাউদ্দীন লাভলুসহ আরও অনেকে। শরীফুল হাসানের ছোটগল্প অবলম্বনে নির্মাতা আসাদ নিজেই লিখেছেন চিত্রনাট্য। লেখকের 'খাসির পায়' ছোটগল্প অবলম্বনে নির্মিত হয়েছে 'খাসির পায়', 'হাঁসের সালুন' তৈরি হয়েছে 'নো এক্সিট' গল্প থেকে। আরেকটি পর্ব 'বোয়াল মাছের বোল' নির্মিত হয়েছে 'খাবার' গল্প থেকে। তিনটি গল্পে তিনভাবে হাজির হয়েছেন মোশাররফ করিম।

## রঙিলা কিতাব - হইচই


দেড় বছর পর আবারও পর্দায় দেখা যাবে চিত্রনায়িকা পরীমণিকে। গেল বছরের মে মাসে তাকে সর্বশেষ দেখা গিয়েছিল 'মা' সিনেমায়। ৮ নভেম্বর ওটিটি প্ল্যাটফর্ম 'হইচই'-তে মুক্তি পাচ্ছে 'রঙিলা কিতাব' ওয়েব সিরিজ। বরিশালের শহরে প্রদীপ ও সুপ্তির সুখের সংসার। নতুন জীবন শুরু হওয়ার আগেই মিথ্যা অভিযোগে সবকিছু এলোমেলো হতে থাকে। প্রদীপের জীবনের অতীত তাড়া করে বেড়ায় তাদের। গর্ভবতী সুপ্তিও ছুটতে থাকে তার স্বামীর সাথে। টান টান উত্তেজনার মধ্যে দুর্দান্ত এক প্রেমের গল্প বলা হয় সিরিজটি জুড়ে। কিঙ্কর আহসানের উপন্যাস 'রঙিলা কিতাব' অবলম্বনে অনম বিশ্বাস নির্মাণ করেছেন সিরিজটি। সাত পর্বের এই সিরিজটিতে পরীমণির বিপরীতে অভিনয় করেছেন মোস্তাফিজ নূর ইমরান। ওয়েব সিরিজটিতে একজন গ্যাংস্টারের স্ত্রীর চরিত্রে দেখা যাবে পরীমণিকে। এছাড়াও বিভিন্ন চরিত্রে আরো আছেন শ্যামল মাওলা, ফজলুর রহমান বাবু, জিয়াউল হক পলাশসহ আরো অনেকে।



## সেকশন ৩০২ - বঙ্গ

১৮ অক্টোবর ওটিটি প্ল্যাটফর্ম 'বঙ্গ'-তে মুক্তি পেয়েছে রিয়াদ মাহমুদের নির্মিত 'সেকশন ৩০২' ওয়েব কনটেন্ট। গল্পে মনির এক শিক্ষিত তরুণ, যিনি চাকরি পাচ্ছেন না; বাধ্য হয়ে ডেলিভারি বয়ের চাকরি করেন। হঠাৎই তিনি জড়িয়ে পড়েন এক উটকো ঝামেলায়। ধীরে ধীরে গল্পে আসে আরও নতুন নতুন চরিত্র। শেষ পর্যন্ত কী হয় ছেলের জীবনে? মার্ভার মিস্ট্রি ধাঁচের গল্প হলেও কমেডি আছে কন্টেন্টটিতে। শাহাজাদা শাহেদের গল্প ও চিত্রনাট্যে এতে অভিনয় করেছেন তাসনুভা তিশা, প্রান্তর দস্তিদার, নীল হুরেজাহান, নিশাত প্রিয়ম প্রমুখ। কনটেন্টটির প্রধান চরিত্রে অভিনয় করেছেন প্রান্তর দস্তিদার।





## নিক্ষ ছায়া - হইচই

চার-পাঁচজন বাঙালি একসঙ্গে হবেন, আর ভূতের গল্প হবে না, তাও কি হয়! কার্যত প্রবাদ বাক্যটিকে মনেপ্রাণে বিশ্বাস করেন অভিনেতা পরমব্রত চট্টোপাধ্যায়। তিনি বিশ্বাস করেন, বাঙালি ভয় পেতে ভালোবাসে। আর সেই বিশ্বাস থেকেই তিনি নিয়ে আসছেন 'পর্ণশবরীর সাপ'-এর দ্বিতীয় সিজন, 'নিক্ষ ছায়া'। ভাদুড়ি মশাইয়ের ভূমিকায় চিরঞ্জিৎ চক্রবর্তী আগের সিরিজেই নিজের বাঁজ বুঝিয়ে দিয়েছিলেন। এবার 'নিক্ষ ছায়া' সিরিজেও তার অন্যথা হলো না। রক্তবর্ণ পোশাক, কপালে তিলক পরে বলিষ্ঠ তান্ত্রিকের ভূমিকায় বাজিমাত করেছেন। তবে এই সিরিজে নীরেন ভাদুড়ির সঙ্গে পাল্লা দিয়েছেন কাঞ্চন মল্লিক। নীরেন ভাদুড়ির অ্যাসিস্ট্যান্ট মিতুলের চরিত্রে অভিনয় করেছেন সুরঙ্গনা বন্দ্যোপাধ্যায়। পুলিশ অফিসারের চরিত্রে ছিলেন গৌরব চক্রবর্তী। সিরিজে বিশেষ করে নজর কেড়েছেন অনুজয় চট্টোপাধ্যায়। ৬ পর্বের সিরিজটি ওটিটি প্ল্যাটফর্ম 'হইচই'-তে মুক্তি পেয়েছে ৩১ অক্টোবর।



## প্যারিস হ্যাজ ফলেন - অ্যামাজন প্রাইম

জনপ্রিয় 'অলিম্পিয়াজ হ্যাজ ফলেন' ফ্র্যাঞ্চাইজির প্রথম সিনেমা 'অলিম্পিয়াস হ্যাজ ফলেন' (২০১৩), 'লন্ডন হ্যাজ ফলেন' (২০১৬) এবং 'অ্যাজেন্ডা হ্যাজ ফলেন' (২০১৯)-এর ধারাবাহিকতায় নির্মিত সিরিজের নতুন পর্ব 'প্যারিস হ্যাজ ফলেন'। ১ নভেম্বর অ্যামাজন প্রাইম এ মুক্তি পেয়েছে হাওয়ার্ড ওভারম্যানের পরিচালিত ওয়েব সিরিজটি। গল্পে এক ভয়াবহ সন্ত্রাসী হামলার পর এক পুলিশ কর্মকর্তা ও এমআইসিঙ্গ এজেন্ট এক হয়ে কাজ শুরু করেন। তাদের আশঙ্কা, প্যারিসে আরও বড় হামলার পরিকল্পনা চলছে। এমন গল্প নিয়ে এগিয়ে যায় সিরিজটি। ৮ পর্বের সিরিজটিতে বিভিন্ন চরিত্রে অভিনয় করেন রিতু আর্য়, তেউফিক জান্নাব, শন হ্যারিস, ইমানুয়েল বারকোট, আনা উলারু, নাগিসা মরিমোটো, জেরেমি কোভিলাল্ট, ক্যামিল রাদারফোর্ডসহ আরও অনেকে।



## দ্য ডেভিলস আওয়ার ২ - অ্যামাজন প্রাইম ভিডিও

জনি এ্যালান এবং শন জেমস থ্রান্ট পরিচালিত ব্রিটিশ এই সাইকোলজিক্যাল থ্রিলার সিরিজটির প্রথম মৌসুম মুক্তি পায় ২০২২ সালে। ছয় পর্বের সিরিজটি ব্যাপক প্রশংসিত হওয়ার পর এবার ১৮ অক্টোবর মুক্তি পায় দ্বিতীয় সিজন। 'দ্য ডেভিলস আওয়ার ২' এর গল্প শুরু হয় প্রথম সিজনের গল্পের পর থেকে। গল্পে লুসি এবং গিডিয়ন এক নরপিশাচ দানবকে হত্যা করার মিশনে নামে। তবে দানবটিকে হত্যা করতে তারা এক ভয়ংকর পথ অবলম্বন করে যা তাদের মৃত্যুর কারণও হতে পারে। তারা কী পারবে দানবটিকে হত্যার করতে? পাঁচ পর্বের এই সিরিজটিতে বিভিন্ন চরিত্রে অভিনয় করেন জেসিকা রাইন, লুসি চ্যামবার্স, পিটার কাপালডিসহ আরও অনেকে।

## মিথ্যা দ্য ডার্কার চ্যাপ্টার - জি ফাইভ

১ নভেম্বর ওটিটি প্ল্যাটফর্ম 'জি ফাইভ' এ মুক্তি পায় কাপিল শর্মা পরিচালিত সাইকোলজিক্যাল থ্রিলার সিরিজ 'মিথ্যা দ্য ডার্কার চ্যাপ্টার'। গল্পে জুহির সুন্দর জীবন স্বাভাবিকভাবেই চলছিল। তবে হঠাৎ অমিত নামক একজন লেখক তার নামে চুরির অভিযোগ দিলে তার জীবনে নেমে আসে অন্ধকার। অন্যদিকে জুহির সৎ বোন রিয়া, সে তার বাবার ভালোবাসা জয় করতে চায়। কিন্তু তারা বাবা জুহিকে অনেক স্নেহ করে, যার কারণে জুহি ও রিয়ার মধ্যে ঝগড়া লেগেই থাকে। জুহির জীবনের এই অনাকাঙ্ক্ষিত ঘটনা কী তাদের সম্পর্ক জোড়া লাগাবে নাকি আলাদা করে দিবে। তা জানতে হলে দেখতে হবে সিরিজটি। ৬ পর্বের এই সিরিজটিতে বিভিন্ন গুরুত্বপূর্ণ চরিত্রে অভিনয় করেন হুমা কুরেশি, রজিত কাপুর, সমীর সোনি, অবন্তিকা দাসানি, পরমব্রত চ্যাটার্জিসহ আরও অনেকে।

